

Suverenitet BiH se ne dovodi u pitanje – Put prema naprijed za BiH je puna integracija u Evropu

Provedba reformi koje će unaprijediti životni standard i koje će omogućiti ovoj zemlji da se u potpunosti integriše u evropske strukture mora biti jasan strateški cilj Bosne i Hercegovine, zaključili su ministar vanjskih poslova Rusije, Sergei Lavrov i visoki predstavnik, Christian Schwarz-Schilling prilikom današnjeg susreta u Moskvi.

Visoki predstavnik i ministar vanjskih poslova Rusije su zaključili da nijedan od bh. entiteta nema nadležnost za organizovanje referenduma o otcjepljenju. Ministar Lavrov je potvrdio opredijeljenost Rusije da poštuje Daytonski mirovni sporazum za čije je provođenje Rusija dala garancije.

Ministar vanjskih poslova Lavrov je izrazio svoju punu podršku planu visokog predstavnika o tranziciji OHR-a u Ured specijalnog predstavnika Evropske unije koji bi se trebao finalizirati do sredine naredne godine te je potvrdio kako je krajnje vrijeme da međunarodna zajednica u potpunosti prenese odgovornosti na bh. vlasti. Složili su se da je BiH ostvarila značajan napredak iako ostaje mnogo toga da se uradi, ali taj posao moraju uraditi bh. lideri.

Visoki predstavnik je pozdravio podršku koju Rusija pruža planu tranzicije, pri tome naglasivši činjenicu da “to zahtijeva od bh. političkih i građanskih lidera da istupe prema naprijed i preuzmu veću odgovornost za budućnost BiH, dok će međunarodna zajednica napraviti korak unatrag.” Visoki predstavnik je dodao: “Smatram da će Evropska unija, u okviru Ureda specijalnog predstavnika Evropske unije, usko

koordinirati aktivnosti sa zemljama članicama Vijeća za implementaciju mira koje nisu članice Evropske unije.”

Izrazivši svoje slaganje sa time da parlamenti u BiH i politički lideri moraju aktivno raditi na provedbi glavnih reformi koje su neophodne za završetak pregovora i potpisivanje Sporazuma o stabilizaciji i pridruživanju između BiH i Evropske unije, pogotovo na reformi policije – koja se mora provesti u skladu sa tri principa Evropske komisije – ministar vanjskih poslova Lavrov i visoki predstavnik su rekli kako su strpljenje, kao i spremnost za iznalaženje kompromisa, od ključne važnosti ako BiH želi osigurati svoju budućnost u okviru Evropske unije.

U toku sastanka, visoki predstavnik je upoznao ministra vanjskih poslova Lavrova sa osnovnim reformskim zadacima koje bh. političari mogu i trebaju ispuniti prije oktobarskih izbora, još jednom naglasivši da je vrijeme ključni faktor. Ostalo je još samo 16 sedmica do izbora – i čak kada bi apstrahirali ovu najvažniju političku okolnost, bh. lideri moraju shvatiti da je svaki dan kašnjenja još jedan izgubljeni dan za građane kojima se uskraćuje korist koju donose reforme.

Ministar Lavrov i visoki predstavnik su ponovo potvrdili svoju opredijeljenost za osiguranje pune saradnje u radu Međunarodnog krivičnog suda za bivšu Jugoslaviju (MKSJ). Kao što je Vijeće za implementaciju naglasilo na svom sastanku u Beču, ovo i dalje ostaje osnovni kriterij za evroatlansku integraciju. Ministar Lavrov i visoki predstavnik su pozvali bh. vlasti, pogotovo predsjednika Republike Srpske i predsjednika Vlade Republike Srpske da djeluju u pravcu ispunjavanja svojih obaveza te da poduzmu odlučne i urgentne mjere kako bi osigurali da svi preostali optuženici, posebno Mladić i Karadžić, budu prebačeni u Hag.